

RUTA

¹ Nega ta, hahemaoro taudia ese tano e lohiaia negana ai, doe bada-hereana e vara. Una negana ai, Betelehem-iuda tauna ta mai adavana bona mai natuna mamaruanedia raruua ida edia hanua e toretania, Moab tanona ai eha noho. ² Una tau ladana na Elimelek; adavana ladana na Naomi; natuna mamaruanedia raruosi ladadia be Malon bona Kilion. Idia na Efrata taudia, Betelehem-iuda amo; Moab tanona ai e kau, unuseni ai e nohova.

³ Bena Elimelek, Naomi adavana, unuseni ai e mase; una hahine mai natuna raruosi ida e noho hedoava. ⁴ Idia raruosi ese Moab ulatodia raruua e adavadia; ta ladana be Oropa, ma ta ladana be Ruta. Edia headava murinai idia na unuseni ai e nohova ela bona lağanı gwauta e ore. ⁵ Bena Malon bona Kilion raruosi e mase; sinadia na sibona e nohova, asi adavana bona asi natuna. ⁶ Taunabunai, ia mai ravana hahinedia raruosi ida e heğægæ, Moab bae toretania, hahine badana ena tano bae lou henia; badina be harina ienai vada e kau Moab ai, Iehova ese ena abi-hidi taudia vada e bogadia hisi, adia vada e henidia.

⁷ Bena ena noho gabuna e rakatania, ia mai ravana raruosi ida, Iuda dalana a e raka ela. ⁸ A Naomi ese ravana raruosi e haduadia, eto, Madi, sinamui edia rumba lou henia; Iehova ese baine hanamomui, umui ese mase taudia o hanamodidava bona lau vada o hanamogu heğereğerena; ⁹ Iehova ese laga-ani baine henimui, adavamui

matamatadia edia rumai ai. Bena e harahudia. Idia na e tai dikadika.¹⁰ Bena raruosi ese e haere henia, eto, Lasi, oi baia bamomu, emu bese taudia dekedia baitala.¹¹ A Naomi eto, Ravagu e, a lou lao; ba bamogu anina be dahaka? Natugu haida ma baina havaradia, umui adavamui ai baela a?¹² Ravagu e, a lou, emui dala ai baola; lau be vada name buruka, basina headava lou. A bama headava lou, hari ina hanuaboi bama headava, natugu mamaruanedia bama havaradia,¹³ umui boma haheauka noho ela bona idia taudia bema lo a? Boma noho vado idia daidiae a? Lasi, ravagu e. Ģau tamona, lalogu eme hisihisi umui daimui ai, badina be Iehova ese vada e murigu.

¹⁴ Ma e taitai louva; bena Oropa ese ravana e hatonia, a Ruta na se rakatania. ¹⁵ Naomi eto, A itaia, bamomu ese ena bese taudia bona ena dirava vada e lou henidia; ia murinai ba raka.¹⁶ A Ruta eto, Basio haġonigu, basioto baina rakatanimu; badina be oi baola gabuna lau danu bainala, bona oi ba noho gabuna lau danu baina noho; oiemu bese na lauegu bese ai bainela, bona oiemu Dirava na lauegu Dirava ai bainela;¹⁷ oi ba mase gabuna ai lau danu baina mase, unuseni ai bae gurigu. Ģau ta ese basine hapararada, mase mo sibona; mauri ai baina rakatanimu, Iehova ese dava badana baine henigu, ma baine hametaua danu.

¹⁸ Rava-bada hahinenia ese e itaia, Ruta na lalona vada e ha-aukaia baine bamoa; bena ia na hereva ta se gwauraia.¹⁹ Taunabunai, raruosi e raka bou, ela bona Betelehem ai e kau. Betelehem ai e kau negana ai hanua taudia iboudiae heau bou heau bou ema; bena hahine na eto, Ina na

Naomi a? ²⁰ Ia na e haere henidia, eto, Ladagu basio hatoa Naomi;* ba hatoa Mara; badina be Ģaubada ena kara egu ai na idita. ²¹ Mai ahugu nala, a Iehova ese ima kavakava vada e halougu. Dahaka dainai ladagu o hatoamu Naomi; a Iehova ese vada e hahemaoro henigu, bona Ģaubada ese vada e hahisigu?

²² Unuhetomana Naomi na Moab tanona amo e lou, ravana Ruta, hane Moab, danu ia ida. Bali† iutuna e matamaia negana ai Betelehem ai e kau.

2

¹ Naomi adavana varavarana ta noho, taga tauna, Elimelek ena iduhu tauna, ladana na Boa.

² Ruta, hane Moab, ese Naomi e hamaoroa, eto, Mani uma bainala, baine lalo namo henigu tauna murinai baina raka, bali anidia momorudia baina gogodia. Ia ese e haere henia, eto, Ravagu, vada aola. ³ Bena ia na ela, bali iutuna taudia muridia amo e raka, bali anidia momorudia e gogova.

Ena raka ai, ia na Boa, Elimelek ena iduhu tauna, ena uma ai e raka vareai. ⁴ Bena Boa na Betelehem amo ema, bali iutuna taudia e hanamodia, eto, Iehova ese baine bamomui. Idia na e haere, eto, Iehova ese baine hanamomu.

⁵ Bena Boa ese bali iutuna taudia ireğudia tauna e nanadaia, eto, Una na daika ena hesiai hahinenen?

⁶ Bali iutuna taudia ireğudia tauna ese e haere henia, eto, Una na Moab hahinenen, Naomi ida Moab tanona amo ema. ⁷ la ese e noigu, eto

* ^{1:20:} “Naomi” anina be “Gaiho”; “Mara” anina be “Idita”.

† ^{1:22:} “Bali” na aniani reina ta, flaoa e karalaia ġauna, uit na heto.

“Mani emu kara uma ai baina raka vareai, bali anidia momorudia na iutuna taudia muridiae baina gogo”. Taunabunai ia na daba ai ema, se lağaa ani ema bona harihari.

⁸ Bena Boa ese Ruta e hereva henia, eto, Natugu, eregu a kamonai: idau uma ai bali anidia momorudia basio gogo, ina uma basio rakatania; egu hesiai hahinedia badibadidiae ba noho. ⁹ Bali e utuamu gabuna ba itaia tao: idia muridiae ba raka. Eregabe taudia vada na taravadia, emu ai basie dau kau. Ba ranu mase negadia ai danu hodu ba lao henidia, eregabe taudia vada e utua ranuna taina ba inua. ¹⁰ Bena hahine na tano ai e goru diho, eto, Dahaka dainai lau, idau hahinenaa, o lalo namo henigumu bona o hağeregumu? ¹¹ Boa ese e haere henia, eto, Harimu vada na kamonai, adavamu e mase murinai ravamu ede o karaia toma; tamamu bona sinamu bona o vara tanona o rakatanidiae, ai idau taumai bogaragimai ai oma. ¹² Iehova ese davamu baine henimu, emu kara heğereğerenaa; Iehova, Israel taumai emai Dirava, hanina henunai o gorumu Diravana, ese davamu namona baine henimu. ¹³ Hahine na eto, Egu lohia e, vada o lalo namo henigu; ena be lau na dia oiemu hesiai hahinedia heğereğerediae to oi ese taugu vada o haloa bona hereva namodia amo vada o hanamogu.

¹⁴ Aniani negana ai, Boa ese e hereva henia, eto, Ini aoma, flaoa ba bitua, vine ranuna ai ba urua diho. Hahine na bali iutuna taudia bogaragidiae e helai diho. Bena Boa ese e gabua balina taina e henia; hahine ese e abia, e ania, bogana e kunu, bahuna danu mia.

15 Ia na e tore isi, bali anidia ma baine gogo eto. Bena Boa ese ena eregabe taudia e haduadia, eto, Igui padadiai danu baine gogo, basio gwaua tao; **16** bona igui amo bali anidia haida ba buruki, tano ai ba nege, bena baine gogo; basio gwau henia.

17 Taunabunai ia na uma ai ma e gogo ela bona ado e rahi. Bena e gwadaia, momona e negea, bali efa* ta heğereğerenä e abia. **18** E laohaia, hanua ela, ravana e haheitalaia; bona bahu danu e henia. **19** Ravana ese e nanadaia, eto, Edesenai bali anidia o gogo hari ina dina ai? Edesenai ai o ġaukara? E hageremu tauna na Dirava ese baine hanamo. Bena ia ese ena ġaukara gabuna na ravana e hadibalaia, eto, Dekenai na ġaukara tauna hari dina ai ladana be Boa.

20 Bena Naomi ese ravana e hamaoroa, eto, Iehova, nega idoidiai mauri taudia bona mase taudia e bogadia hisimu Diravana, ese ia baine hanamo. Naomi ma eto, Una tau na iseda iduhu tauna, ita varavarada. **21** Ruta, hane Moab, eto, Ia danu e hamaorogu, eto “Egu eregabe taudia badibadidiae ba noho ela bona egu taboro baine ore”. **22** Naomi ese ravana Ruta e hamaoroa, eto, Ravagu, namona binai, iena hesiai hahinedia ida ba raka bou, idau uma ai dika emu ai baine kau na garina.

23 Taunabunai ia na Boa ena hesiai hahinedia ida e raka bou, momoru e gogo, ela bona bali iutuna bona uituna vada e ore. Rava-bada hahinenai dekenai e nohova.

* **2:17:** “Efa” na Heberu taudia edia hahetoho ġauna ta.

3

¹ Ravana Naomi ese Ruta e hereva henia, eto, Ravagu e, emu noho gabuna ta baina lailaia bena unuseni ai ba noho namonamo ani? ² Varavarada Boa, ena hesiai hahinedia o bamodia tauna, na hari ina hanuaboi ena bali e tapoamu, ena gwada-gwada gabuna ai. ³ Taunabunai, a digu, kopimu dehoro amo ba dahua, emu dabua namona ba hahedokia, bena hari gwadagwada gabuna baola; to ienai basio hedinarai ela bona baine aniani bona baine inuinu vaitani. ⁴ Bena baine hekure negana ai ena hekure gabuna do ba itaia, gabeai ba raka vareai, ena hetaru aena amo bavabia isi, ba hekure diho; bena ede ba kara toma ia ese baine hadibamu. ⁵ Ruta eto, Emu hahedua heğereğerena baina karaia.

⁶ Taunabunai ia na hari gwada-gwada gabuna ela, ravana ese e haduaia heğereğerena e karaia. ⁷ Boa na e aniani bona e inuinu vaitani, bena mai moalena ida e hekure diho, uit senuna gwaduna ai. Bena Ruta na asi reğereğena ela, hetaru na aena amo e abia isi, e hekure diho. ⁸ Malokihi, Boa na e noga, e hoa, e helai tore, hahine na e itaia, ia aena badinai e hekure. ⁹ Ia eto, Oi be daika? Hahine na e haere, eto, Lau binai Ruta, emu hesiai hahinenai; emu hesiai hahinenai ba tarugu, badina be oi na adavagu e mase tauna varavarana. ¹⁰ Boa eto, Natugu e, Iehova ese baine hanamomu; ina emu kara namona gini-gabena ese emu kara namona gini-gunana vada e hereaia: badina be oi na uhau, mai edia ogoğami eiava mai edia tağɑ, so sihari henidia. ¹¹ Taunabunai, natugu e, basio gari; emu noinoini heğereğerena do baina kara henimu,

badina be egu hanua taudia iboudiai dibadia oi na kara-namo hahinena. ¹² Momokani, lau na adavamu e mase tauna varavarana; ġau tamona, ia varavara-dosina ta do noho. ¹³ Hari hanuaboi iniseni ai ba noho. Daba ai, ia na baine ura baine adavamu, namo; a bema lasi, lau ese baina adavamu. Iehova maurina ladana ai na herevamu. A hekure diho ela bona daba.

¹⁴ Taunabunai, ia na ia aena badinai e hekure ela bona daba. Daba vaburana ai, taunimanima do basie heita heheni negana ai, ia na e tore isi. Boa ese e hahedua, eto, Tau ta basine diba hari hahine na gwada-gwada gabuna ema. ¹⁵ Bena ia ese hahine na e hereva henia, eto, O dokiamu dabuana a mailaia, avabia papa. Hahine na e abia papa, bena Boa ese bali efa tauratoi e uda, e henia, baine laohaia; bena hahine na hanua e lou lao.

¹⁶ Ravana dekenai e kau negana ai, ravana ese e nanadaia, eto, Natugu e, edeheto? Bena ia ese Boa ena kara idoinai sivaraina e gwauraia. ¹⁷ Ma eto, Ia danu bali efa tauratoiosi bini e henigu, eto “Ima kavakava ai ravamu basio lou henia”. ¹⁸ Ravana eto, Natugu e, ba henari ela bona ba diba ede baine kara toma: badina be hari tau na laġana basine ania to han dina ai ina ġau baine haġugurua.

4

¹ Boa na hanua ikoukouna ela, unuseni ai e helai diho; bena hari mase tauna varavaradosina, Boa ese e herevalaia tauna, e raka hanai. Boa ese e boi henia, eto, Turagu e, mani aoma, iniseni ai a helai. Bena hari tau ema, e helai

daho. ² Bena Boa ese hanua tau-badadia gwauta e boiridia, eto, Mani a helai diho. Bena e helai diho.

³ Bena ia ese hari tau e hereva henia, eto, Naomi na Moab tanona amo vada e lou mai, bona e uramu varavarada Elimelek ena tano baine hoia e tomu. ⁴ Taunabunai, na lalomu, oi baina hamaoromu na tomu: ba ura oi ese ba iloia, iniseni ai e helaimu taudia vairadai bona hanua tau-badadia vairadai. Ba ura bavabia, vada bavabia; a basio ura vada ba hamaorogu, baina diba; badina be iabina mai siahuna tauna na oi, bona oi murimu ai lau. Hari tau eto, Bainabia abia. ⁵ Boa ma eto, Tano Naomi imana amo bavabia dinana ai, Ruta, hane Moab, mase tauna vabuna, danu bavabia, mase tauna dihina ihavarana totona. ⁶ Bena hari tau eto, Lau na basina abia diba, sibogu dihigu ai baina dabu na garina. Oi ese bavabia, badina be lau be basina abia diba.

⁷ Nega gunadia ai Israel taudia edia kara na iniheto, tano e hoihoilai negadia ai: hoi-hoi ihamomokanina toana na tau ta ese ena tamaka ta e kokia oho, ena tano e hoia tauna e henia. Ihamomokanina toana bunai Israel ai. ⁸ Taunabunai hari tau ese Boa e hamaoroa, eto, Oi ese bavabia; bena ena tamaka ta e kokia oho. ⁹ Bena Boa ese hanua tau-badadia bona hanua taudia iboudiai e hamaorodia, eto, Hari dina ai umui ese vada o itaia bona vada o kamonai lau ese Naomi ena amo Elimelek ena ġau idoinai bona Kilion ena ġau idoinai bona Malon ena ġau idoinai vada na hoi; ¹⁰ bona Ruta, hane Moab, Malon vabuna, danu vada na hoia, baina adavaia, mase tauna dihina ihavarana totona, ladana basine boio ena iduhu ai bona ena hanua

ai helaoreana. Hari dina ai vada o itaia bona vada o kamonai danu. ¹¹ Bena hanua ikoukouna ai e helaiva taudia bona hanua tau-badadia eto, Ai na vada a itaia bona vada a kamonai. Iehova ese emu ruma ai be dae kaumu hahinena na Rahela bona Lea, Israel besena ihavarana hahinedia, hegeregeredia ai baine halaoa. Oi danu Efrata ai ba taḡa, bona Betelehem ai harimu baine namo; ¹² emu ruma taudia danu Perese Iuda, Tamara bogana amo e vara tauna, ena ruma taudia hegeregeredia ai baela, Iehova ese ina eregabe hahinena ena amo natumu baine henimu dainai.

¹³ Taunabunai Boa ese Ruta e abia, e adavaia. Raruso e eno bou, bona Iehova ese hahine e hanamo; bena hahine na e rogorogo, mero ta e abia. ¹⁴ Bena hanua hahinedia ese Naomi e hereva henia, eto, Iehova aita hanamo, badina be hari dina ai oi garamu vada e henimu. Ia ladana baine bada Israel ai. ¹⁵ Ia ese emu mauri baine hamatamataia, bona burukamu ai baine narimu; badina be ravamu, e lalokau henimumu hahinena, tatau hahitu e hereadiamu hahinena, ia ese vada e havaraia. ¹⁶ Bena Naomi ese mero karukaruna e abia, e rosia, bona e reḡua. ¹⁷ Bena dekena hahinedia ese mero ladana e hatoa, eto, Naomi na mai natuna, bena ladana e hatoa Obed. Ia na Iese tamana; Iese na David tamana.

¹⁸ Perese garana bini: Perese ese Hesron e havaraia; ¹⁹ Hesron ese Ram e havaraia; Ram ese Aminadab e havaraia; ²⁰ Aminadab ese Nason e havaraia; Nason ese Salmon e havaraia; ²¹ Salmon ese Boa e havaraia; Boa ese Obed e havaraia; ²² Obed ese Iese e havaraia; Iese ese David e havaraia.

**Buk Baibel long tokples Motu
The Holy Bible in the Motu language of Papua New
Guinea
Buk Baibel long tokples Motu long Nuigini**

Copyright © 1959-1973 Bible Society of Papua New Guinea

Language: Motu

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files dated 9 Oct 2020

f540ed61-0b88-5365-8502-08ea44547ef2